



Mehlaeng

□ Danz Hijvah / 谭喜花

Banringz song diemjung, doek fwn iq, loh mbaeqsubsub. Dahngozi riengz Daegbauj byaij haeuj mbanj daeuj.

Baihnaj, aen ranzvax vaihvedved he youq ndaw fwnrumz yaek laemx mbouj laemx, hawj Dahngozi doeksaet yat.

Bohmeh Daegbauj hwet gaeuz ga goz ndwn youq bakdou riunyumnyum angqcoux songde, gij riznyaueu gwnz naj cungj mbehai lo.

Haeuj ranz, Daegbauj najmong naeuz Dahngozi: “Neix dwg ranz gou caeueq bohmehe gou.”

Daegbauj youh cam: “Siujlungz bae lawz guhcaemz, lij caengz raen haeuj ranz ne.” Ngamq dingz bak, laeq lwgsai caet bet bi baedauq he, ndang daenj uqnyueknyuek diuqyet cung gvaqdaeuq.

Laeq lwgsai neix baez raen Dahngozi couh nyengh lo, ndwn youq gizde mbouj guhsing.

“Siujlungz, vaiq heuh daxheiz.” Daegbauj naeuz.

“Hw!” Siujlungz gyauej hix mbouj ngeux couh ndonj haeuj ndaw rug bae lo. Dahngozi naj hoengzfefe ndwn youq gizde, de caen siengj sikhaek riujae deuz. Daegbauj mbouj ndei eiqseiq naeuz: “Gou mbouj ndaej youq henz ndang son de, mwngz gaej gvaiq.” Dahngozi mbouj han, raemxda gaenq youq ndaw gvaengzda cienqlulu.

Dahngozi caeueq Daegbauj caez youq aen bouqngaiz he guhhong, Daegbauj dwg daeuzdajcawj, Dahngozi dwg boux cienmonz dawz byaek hwnj daiz.

Ngoenz ndeu, gyoengqde cingq guhhong nyaengqyetyet, miz dienhvah daeuj, naeuz daxboh Dahngozi oksaeh lo.

Daxboh Dahngozi bang Gouxngeih caep ranz, daj gwnz gyaq doek roengzdaeuq, diuz ndokhwet caeueq diuz gaswix raek lo. Gouxngeih guh ranz cienz yungh sat lo, mbouj miz cienz yawz bae yw bouxsieng. Dahngozi caeueq daegnuengx dauqcawq ciq cienz, hoeng lij ra mbouj gaeueq cienz bae yw daxboh. Dahngozi ngoenzngoenz daej, mbouj siengj guhhong, mbouj siengj gwn, ndang bienq byom, saeknaj hix bienq heu caez.

Daegbauj dawz 3 fanh maenz hawj Dahngozi, naeuz: “Gou cij miz di cienz neix, mwngz dawz bae yw doxboh gonq.”

Langh youq doenghbaez, Dah-

ngozi mbouj gamj aeu, seizneix feiz doek daengz gwnz din, de mbouj aeu mbouj ndaej, mbouj aeu caen mbouj rox bae gyawz ra ciq lo.

Daegbauj vunzndei simsoh, Dahngozi mbouj rox mbouj nyinh couh doiq de miz cingzeiq. Daegbauj hix roxnyinh Dahngozi baenzsau youh gaenx hong, ndawsim de hix miz Dahngozi lo, songde couh doxndei lo.

Miz duenh seizgan he, Daegbauj baez raen Dahngozi couh ngaemgyaeu ndojdeuz, hix mbouj nyienh caeueq de gangj vah. Dahngozi ngeix mbouj doeng, gyaep dawz Daegbauj cam.

Daegbauj naeuz: “Ngozi, gou mbouj siengj muenz mwngz, bohmehe gou geq lo, yah gou caeux couh gvaqseiq lo, miz boux daeglwg ndeu. Caiqlix, dou lij youq ranz vaih, caengz ndaej guh ranzlaeuz moq.” Daegbauj yied gangj sing yied iq, doeklaeng lienzi swheij cungj yaek dingq mbouj nyi.

“Gou mbouj naemj lai, gou cij naemj caeueq mwngz gvaq ciuhneix.” Dahngozi riunyumj muengh coh Daegbauj. Daegbauj dingq le, angq ndaej got ndaet Dahngozi.

Baezneix Daegbauj couh yaek daiq Dahngozi maranz. Bak gangj ndaej soeng, caen riengz bae Dahngozi lij dwg miz di mbouj onj. Haemhde, de fan bae foek dauq ninz mbouj ndaek, gag hwnqdaeuq naengh ndaw ding, de naemj: Daegbauj ranz vaih youh gungz, bohmehe geq couh suenq lo, lij miz daeglwg he dem, caen mbouj rox baenzlawz gvaq……

Daegbauj lumjbaenz rox aen sim Dahngozi nei, naeuz: “Ngozi, raeuz seizneix caengz lingx cwnq, mwngz ienqhoij lij ndaej gib.” Dahngozi youq ndaw laep mbouj dap vah, caenh danq gaemz heiq raez he.

Ranz ngamq rongh, Daegbauj bae cawj ngaizromh, Dahngozi naeuz: “Dwg mbouj dwg gwn can ngaiz neix le, couh gyaep gou deuz.” Daegbauj doeksaet muengh Dahngozi. 4 da doxmuengh, song boux cungj riu lo.

Mbouj geij nanz, Daegbauj caeueq Dahngozi doxyaeng bae dajgoeng, Dahngozi yawjyawj aen ranz mbouj baenz yiengh, naeuz: “Bohmehe geq lo, Siujlungz hix aeu goq, mwngz bae gonq, gvaqlaeng gou caiq riengz bae.”

Daegbauj ngamq bae, aen sim Dahngozi couh fouzfwdfwd lo. Song bouxlaux doiq Dahngozi ndei, bungz vunz couh haenh Dahngozi dwg bawx

ndei he. Siujlungz gag guh faenh swheij, mbouj swt Dahngozi, Dahngozi roxnyinh gyauej in lai.

Siujlungz youq aen siujyoz gwnz haw doeg ngeih nienzgaep, youq hagdangz gwn ninz, singhgizhaj lajbyonghngoenz cij maranz. Dahngozi naemj: Aeu sim dag sim, gou mbouj saenq cungj dwg yienghneix.

Dahngozi dawz aen ranz ndaw rog baet ndaej cinghseuq, doenghyiengh baij ndaej cingjaez, dawz buhvaq daengx ranz vunzsaeg ndaej seuqsaksak, ndangdaenj Siujlungz hix mbouj lumj gaxgonq yienghde uq lo.

Siujlungz yaek maranz, Dahngozi couh nyaengq dajcawj hawj de gwn, naihsim son de guh cozyez, roxnaeuz caeueq de bae youzbyaij saek yaep. Muengh faj naj iq Siujlungz daj heu bienq ndaej hoengzfe, ndawsim Dahngozi diemzsis.

Ngoenz he singhgizhaj lajbyonghngoenz, bingzseiz duenh seizgan neix, Siujlungz caeux couh maranz lo, seizneix lij caengz raen gaeuz. Dahngozi simgip raixcaix, doq daj dienhvah cam lauxsae. Lauxsae naeuz Siujlungz gaenq hwnj yauceh ma lo. Dahngozi vueng ndaej hanh lae rim ndang, cam daxgoeng daxbuz bingzseiz Siujlungz gyaez bae gyawz guhcaemz, roxnaeuz bae ranz caencik beixnuengx lawz lo? Daxbuz naemj yaep he fwt geiq hwnjdaeuq: “Roxnaeuz Siujlungz bae ranz daxdaiq de lo.” Geij boux couh ganj bae gizde lo.

Ranzdaiq Siujlungz mbouj gyaep, naengh cidienh 10 lai faencung couh daengz. Dahngozi gyoengqde ganj daengz gizde, raen Siujlungz youq ndaw gyanghongh caeueq song daegnuengxbiuj guhcaemz. Daxdaiq Siujlungz baez raen Dahngozi couh najhaen lo, fok naeuz: “Mwngz dwg dah Daegbauj ngamq daiq maranz ba, vah naeuz 10 boux mehlaeng 9 boux doeg, lij caengz caeueq de doxaeu ne, couh doiq Siujlungz baenzneix yak!”

“Daxdaiq Siujlungz, mwngz dingq gou gangj gonq, mbouj dwg yienghneix law!” Dahngozi geij naeuz.

“Mbouj siengj dingq mwngz meh iucing neix gangj baenz lai lo, mwngz gangj mwngz ndei, Siujlungz lij ma gizneix guh maz!” Daxdaiq Siujlungz youh laebdaeb fok Dahngozi.

Baez Daih’it bungz daengz gij saeh neix, Dahngozi ndwn anj youq gizde mbouj rox baenzlawz guh. Daxbuz ganjvaiq ragdawz Siujlungz caeueq Dahngozi, buetdeuz lo.

Gyanghaemh haeuj ninz, Dahngozi baenzlawz cungj ninz mbouj ndaek, raemxda mbouj roxnyinh lae roengz najgemj daeuj. Dang mehlaeng vunz hoj guh lai lo, Dahngozi caen siengj coenz vah he hix mbouj ce, buhvaq hix mbouj gienj, laeglemx deuz bae. Hoeng de naemj daengz Daegbauj doiq swheij baenzneix ndei, lauheiq lajmbwn caiq ra mbouj raen bouxsai yienghneix lo. Siengj daengz neix, Dahngozi uet bae raemxda, netsim ninz lo.

Daj mbatneix le, Siujlungz lumjbaenz dingqvah le haujlai, Dahngozi gag caegcaeg angq.

Ngoenz ndeu, Daegbauj daj ndaw singz maranz, de lwnh Dahngozi nyi, seizneix rom ndaej ngaenz yaek gaeueq guh ranz lo, danghnaeuz mbouj gaeueq hix mbouj you, seizneix guekgya cwnqcz ndei, cek ranz naeuh guh ranzlaeuz moq goj miz ngaenz boujdiep. Caj guh ranz ndaej le, caiq bae daenggeiq hix mbouj nguh. Dahngozi dingq le, sim’ angq ndaej lumj va hai nei.

Cuengq sujgyaj miz ngoenz ndeu, Dahngozi baenzngoenz cungj mbouj raen gaeuz Siujlungz. Dahngozi youh dingj naj na bae ranzdaiq Siujlungz ra, hix mbouj raen. Mbouj yungh gangj, Dahngozi youh deng daxdaiq Siujlungz ndaq can haenq ndeu. Ra lwg youqgaenj, Dahngozi nyaenx raemxda, singgip singgaenj heuh coh Siujlungz yiengj doh ndaw mbanj.

Ra mbouj raen Siujlungz, Daegbauj youh mbouj youq ranz, Dahngozi simgip lumj feiz coemh ndang. Dahngozi naengh cidienh bonghfafa ganj daengz gwnz haw bae ra, raen bouxsai caeueq mehmbwk cungnienz he cingq yaek daiq Siujlungz caeueq dahniq he hwnj aen ciiq he bae.

Dahngozi cung gvaqbae couh hat: “Sou dwg byawz, yaek daiq lwg gou bae gyawz?!” Dahngozi baez hat, songde hwk ndaej muengz ndonj haeuj ndaw ci bae, “fw” sing he, aen ciiq buet bongh bae naj mbouj raen lo.

Dahngozi ganjvaiq mbon soujgih bauqgingj. Mbouj yaep ndeu, bouxsai caeueq mehmbwk haenx couh deng gingjcaz humx dwk gaemhdawz lo.

Songde dwg canghbuenq lwgyez, cienmonz gai lwgnyez aeu ngaenz, raen Siujlungz caeueq dahniq haenx dandog youq gwnz haw guhcaemz, couh yaeuh gyoengqde bae diegwnq guhcaemz.

Siujlungz caeueq dahniq haenx caengz ndaej bae gizwnq guhcaemz gvaq, baez dingq couh angqvauvau yaek riengz bae. Caeklaiq Dahngozi ganj daengz, mboujnex couh hwnjdangq lo.

Gaemhdawz songde le, gingjcaz swnh gaeu lumh gva, gouq ndaej haujlai lwgnyez gaxgonq deng gai, gyoengq bohmehe raemxda laeboegboeg angqcoux lwgnyez swheij maranz, hix gig gyo’mbaiq gingjcaz caeueq Dahngozi.

Doeklaeng Siujlungz engq dingq gij vah Dahngozi lo, hix roxnyinh aiq mbouj dwg sojmiz mehlaeng cungj simyak!